

UPA2022/95: Tasiilami efterskolimik pilersitsinissaq siunertaralugu pilersaarummik UPA 2023-mi Naalakkersuisut saqqummiusseqqullugit Inatsisartut aalajangiiffigisassaattut siunnersuut.

(Inatsisartunut ilaasortaq Mala Høj Kuko, Siumut)

UPA2022/134: Tasiilami adventure efterskolimik pilersitsinissamik Naalakkersuisut peqquneqarnissaannik siunnersuut.

(Inatsisartunut Ilaasortaq Harald Bianco, Inuit Ataqatigiit)

Akissuteqaat

(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Aappassaaneerinninneq

Naalakkersuisut Kultureqarnermut, Ilinniartitaanermut, Ilisimatusarnermut Ilageeqarnermullu ataatsimiititaliap peqqissaartumik suliaqarsimaneranut isumaliutissiissutaannullu qutsavigaat.

Aallarniutigalugu Naalakkersuisut ataatsimiititaliamut uppersassavaat kisitsisit Naalakkersuisut Maniitsumi efterskolimiit aamma Efterskole Villads Villadsenimiit pissarsiarisimasaat piffissap aallartinneraneersuummata taakkualu atuartut qassit efterskolini ukiup atuarfiusup aallartinnerani tiguneqartarsimanersut takutippaat, kisitsisilli Naatsorsueqqissaartarfimmeersut ukiup atuarfiusup naaneraneersuullutik. Kisitsisit taakkua ersersippaat atuartut qassit efterskolini ataasiakkaani ukiup atuarfiusup ingerlanerani atuarsimanersut.

Naalakkersuisut maluginiarpaat ataatsimiititaliap isumaqatigiittup Naalakkersuisut allannguutissatut siunnersuutaat aamma immikkoortoq 134 itigartinneqartussatut inassutigigaat, immikkoortorli 95 akuersissutigisassatut inassutigalugu.

Naalakkersuisut ataatsimiititaliap tamatumunnga tunngavilersuutaat tusaatissatut tiguaat.

Ataatsimiititaliap isumaliutissiissummini naggasiullugu nalunaarutigaa ataatsimiititaliap siunnersuut aappassaaneerinninnissamut ingerlaqqittussatut inassutigigaa, oqaaseqaatigineqartut ilanngullugit, isumaliutissiissummilu paasinninneq nalunaarutigineqartoq ilanngullugu.

Naalakkersuisut maluginiarpaat ataatsimiititaliap Tasiilami efterskolimi atuartussat amerlassusissaattut tunngaviusussat pillugit ataatsimiititaliaq isumaqartoq amerlanerusunik inissanik pisariaqartitsisoqarnerisig Tasiilami efterskolimik pilersitsinissamut iliuusissanut pilersaarusiornikkut qulaarneqartariaqartoq. Naalakkersuisut tamanna ilalerpaat. Taamatut oqaaseqarluta Naalakkersuisut inassutigisavaat ataatsimiititaliap inassuteqaatai akuersissutigineqassatut.